

Lětsa znowa bjez wulkeho wubědźowanja na Kaponicy Zapóslanc Jaworski MC wopytał

Jawora (jh/SN). „Za 2013/2014 je sakski sportowy zwjazk dwanaće milionow eurów za sportowe investicije zaplanował. Je-li pomoc trěbna, móžu zwisk k zamołwitym nawjazać“, rjekny pjatk popołdnu na motocrossowej čarje na Jaworskej Kaponicy zapóslanc Sakskeho krajneho sejma Alojs Mikławšk (CDU). Wjacore sportowe zjednoćenstwa bě wón tón dzeń wopytał a ze zamołwitymi rečał. „Hakle potom ličimy z dalšim wulkim zarjadowanjom. Za lěto 2013 nochcu ničo přeradzić. Běhi wo němske mišterstwa budu na kóždy pad“, zwurazni předsyda MC Jawory Thomas Zowalla. Poprawom wšak su sej w Jaworje tajki megaevent, kaž „motocross narodow“, kóždej dvě lěće zaplanowali, ale po tym zo bě Italčan Guiseppe Longo prawa za tajke požadane wubědźowanja kupił, je zakładna suma, kotraž dyrbi so płacić, problem.

MC Jawora, čisło 1 w Sakskej, steji tuchwilu na solidnym fundamencie. Zowalla: „Smy w zašłych lětach wjele wotdžěłali, polěpšili a natwarili. Hdyž so konkurenca z nami wo wubědźowanja požada, dyrbi najprjedy lépsa być.“ Wosebje hordži su Jaworčenjo na dorostowu skupinu, kotruž nawjeduje tam serbski motorsportowc Měrcin Špitank z Budyšina. Jónkrótny projekt z Worklečanskej šulu „Michał Hórnik“ wotměja tam nětko hižo třeće lěto. Mjeztym je ADAC Sakska trěbny material přewostajił a móžnosće

za trenowanje polěpšil. Za lětsa stej hišće wubědźowanskej tydženjej na Kaponicy planowane. Njedzelu, 2. septembra, a spočatk oktobra přewjedu tam kónčne běhi cross-kluba ADAC wo němske mišterstwa za solowe mašiny a kwady. Naposledk mjenowane zarjadowanje płaci něhdze 80 000 eurów. Z pomocu swěrných sponsorow a gmejny Pančicy-Kukow, ze zastupnymi pjenjzami a přijomnym wjedrom chce MC Jawora to zaso zmištrować. Klětu a za dvě lěće měł potom tež zapóslanc Mikławšk pomhać.



Alojs Mikławšk (naprawo) w rozmólwje z předsydu MC Jawory Thomasom Zowallu
Foto: jh